

MUKANDA WAKAFUNDELA PAULU***TITO******Ambütumela Moyo***

1 Paulu, ukambi a Unyashungu, utumami a Jesu Kristu, uku mbetawo ka esonami wa Unyashungu, la dia eyelu k'akambu wa mete wedimi la ololo tshe, 2 lu elungamelu ka lumu la pundju, le Unyashungu, laheyi mvuta kashi, uku akandalaki lu deku diaketi; 3 keli lu tena diandi, mbakandat恒na dia ui diandi, diakawambisha dia mvutela antu uku weli oleme wa Unyashungu, Ushimbedi asu;

4 Le Tito, uku on'ami la mete lu mbetawo kasu:

Ngandji ka mamba la ki k'uma le Unyashungu Shesu la uma le Kristu Jesu Ushimbedi asu, wayali la ye!

***Lama Nsonola Dikumanyi;
Wetshelu le Amendji w'Ekelezia***

5 Dia dikambu ne, mbakamakutshiki la Kerete, dia we nongosola akambu wakatshikala, la dia nsonola dikumanyi l'usumba la usumba, uku akamakutela, 6 naka untu aha la unungu, leli la wadi otoi utu, ndu leli la an'andi embetawudi, waha asongwamedu wa lundju la uhedia. 7 Dieli la umendji w'Ekelezia dia ndjala aha la unungu, uku ulami a diango dia Unyashungu. Ndi hahumbi ndjala kanga lukanyi, umbuki a kele esadi, umbidjoki a wanu, okomwanyi, kana kanga saki k'ukundji. 8 Keli ndi atshelaki angendangenda ololo, ayali unangi w'akambu w'ololo, ayali l'utema a ki, atsheli antu tshe ololo, ayali uku untu l'ekila, ayakimeli. 9 Ndi akimeli diui dia kolamelu dieli uku wetshelu, ne dia ndi mbeya ndaka antu dietshelu di'ololo, la dia nembohaya akanga a tamu. 10 Ne dia akanga w'uhedia efula weko, weli akanga w'eyokayoka la akesanyi, ambahemi w'chekeli wuleki. 11 Dieli la wo dia ndjiha enyo awo. Vo watulanyaka khumbu la khumbu, watetshaka antu akambu weli kema ololo dia mbaetsha, ne dia pusa k'ukundji. 12 Umvutshi awo omotshi akati ati: Asi Kerete weko akanga

a kashi nshi tshe, weko uku nyama ya kolo, weko akanga a dishi wa nende. 13 Diui ne dieli mete. Dia dikambu ne, ahunwelaki wulu, dia vo ndjala la wulu lu mbetawo. 14 Tawetawoki ekondo w'asi Juda, la elembe w'antu wakanganelu uma lu akambu wa mete. 15 Akambu tshe weli pudipudi le akanga w'etema wa pudipudi. Keli le antu wa kolo la waha la mbetawo, nduku dikambu dieli pudipudi lu ashu awo. Keli tukanyi tawo la khum'etema yawo yambulanaka. 16 Vo watutaka vati: Shu mbeyaka Unyashungu, keli vo watuwangunaka lu etsha awo. Vo watuyalaka wononyi, ndu akanga w'uhedia, hawututshaka nduku dikambu di'ololo.

Akambu w'Ololo Wahumba Antu Ntsha

2 Keli etsha antu akambu wusunganyi la dietshelu dia mete, 2 dia dikumanyi ndjakimela, ndjala la kenemo, la ki, la wulu lu mbetawo, ndu ngandji, ndu lu kolamelu. 3 Ndu dikumanyi dia amantu wayali la kenemo lu akambu awo, tawyalaki atendanyi, kuyanga fumbi ya wanu. Vo wayali embetsha wa akambu w'ololo, 4 dia vo mbekiya esekaseka w'amantu dia nanga waumewo, la an'awo; 5 ndu dia ndjala la etema wa ki, la tukanyi ta pudipudi, ndu dia ntsha ulimu la wakawo. Vo wayali la memakana, wayali la ukitanyia le waumewo, ne dia diui dia Unyashungu tadiotengamaki. 6 Okokomiya ndu elongo w'apami dia vo ndjala la etema wa ki. 7 Lu akambu tshe, uyali djimbitelu ya etsha w'ololo. Tuyalaki la lukesu lu wetshelu aye, uyali la kenemo. 8 Utaki aui w'ololo, wahaweyi ntana munga, ne dia utunyi utshami sonyi, ndi tayalaki la dikambu dia ntosongwela. 9 Okokomiya fumbi dia vo ndjala l'okongo wa akhumewo, la dia mbangenyanganya lu akambu tshe; tawyalaki la uhindudi; 10 tawuvaki, keli wenyaki kolamelu y'ololo tshe. Okone wayuluwanya dietshelu dia Unyashungu, Ushimbedi asu lu akambu awo tshe.

Dikambu Diakayakimo Ushimbedi Asu

11 Ne dia ngandji ka mamba ka Unyashungu kambene, kambela panda le antu tshe, 12 kambutsetsha lama ntuna akambu wa dionyo la saki y'akambu wa la kete, dia shu ndjala la nyumu ya ki, y'uluwanyi ndu y'olo la kete nye. 13 Tulungameli elungamelu kasu k'otshoko la enelo ka lutumbu la Unyashungu asu a wuki ndu la Ushimbedi Jesu Kristu, 14 lakayakimo dikambu diasu, dia ndi ntutshungula uma lu kolo tshe, la dia mbedia antu wayali wandi hita, ndu dia saki k'elimu w'ololo.

15 Utelaki antu akambu ane: âkokomiyaki, âhunwelaki la wulu tshe. Untu takonyolaki.

**Eshimbamelu Uma lu
Mbetawo la Ehilwelu k'Uyuyu**

3 Uwauhuli dia mbetawo embuledi, ndu ewandji, la dia ndjala la ukitanya, la dia ndjalongosola lu elimu w'ololo tshe. 2 Tawotengaki untu, tawuyalaki la ngala, keli wayali la memakana, wenya antu tshe ndjakitshakitscha lu akambu tshe. 3 Ne dia ndu shu mbaki dinginya ntundu, taki la uhedia, takadimbiyama, takayala la lutunu la kandjema, la djawudi, takahetshanya. 4 Keli lam'akene ketshi ka Unyashungu, Ushimbedi asu, la ngandji kandi le antu, 5 aha dia etsha w'ololo wakatatshi shame, keli ne dia ketshi kandi mbakandatushimbela uma lu diotshelo dia mbuto k'uyuyu la ehilwelu k'uyuyu ka

le Nyuma k'Ekila, 6 kakandatutshulwela uma le Jesu Kristu, Ushimbedi asu; 7 dia shu nyindjama lu ngandji kandi ka mamba, shu tayeya ndu ndjala ekito lu elungamelu ka lumu la pundi. 8 Diui ne dieko mete.

Dimi nangaka we mvuta akambu ane la eteti, dia wane waketawo Unyashungu ntetemala vame lu ditshelu di'ololo. Akambu aso weko ololo ndu waho le antu. 9 Keli utuni dimbwanelu dia dinginya, ndu akambu wa nonga y'antu, ndu etshanelu, ndu tamu t'elembé. Akambu ako kema waho, ndu weko anyanya. 10 Utuni umbatudi lam'ayuyûhunwela etena otoi kana tena pendì. 11 Eyi wati: Untu ako ambunganela, ambutsha kolo, ambuyamia.

Aui le Antu Amotshi

12 Lam'ayumukutumela Aratema, kuyanga Tukiko, kuhimbi la wulu aye tshe dia we ndja le mi la Nikopoli, ne dia dimi lambusanguya mbidjase leko l'eleku ka tshitshi. 13 Utumi Zenasi, umbeyi w'elembé, la Apolo lu lokendo lawo esadi; vo tawuhumbaki engo. 14 Ndu asikasu weki lama ntsha elimu w'ololo dia nungula diango diahumbawo, diaha vo ndjala waha la elua.

15 Weli la mi tshe wambukutumela moyo. Umewmeli wane tshe watulanga lu mbetawo moyo.

Diui Di'Etshokwelo

Ngandji ka mamba kayali la nyu, nyu tshe!